



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

An. Neapolitano Archiepiscopo.

urn:nbn:de:hbz:466:1-20006

memoriam in majoribus Ecclesiis transscripta fervetur.

In eundem modum Archiepiscopis, Episcopis, Abbatibus, Prioribus, & universo Clero in Apulia constituto.

ARCHIEPISCOPIS, EPISCOPIS, Abbatibus, Prioribus, & universis Ecclesiarum Prælatibus in Sicilia constitutis.

Epist. 413.
Vt Legato apostolico obtemperent, & piam illius voluntatem adjuvent.

Persecutionis olim olla succensa, dum flantis rabies aquilonis Calabros montes novo deiceret terræ motu, & per plana jacentis Apuliæ pulverem in transeuntium & habitantium oculos suo turbine suscitaret, dum etiam Tauro-minitana Charybdis sanguinem, quem tempore pacato sitiverat, evomeret cædibus satiata, usque adeo fuit iter maris & terræ præclusum, ut interjacentis impetus tempestatis mutuam matris ad filios & filiorum ad matrem impediret affectum, & naturalis affectum intercepterit caritatis. Nunc autem cum eo faciente nobiscum signum in bonum cui venti & mare obediunt, nascentis austri clementia cadentis fugaverit impetum aquilonis, & præteritæ turbationis caliginem aëris per Dei gratiam jam ex majori parte placati claritas serenaverit, ita quod regnum Siciliæ reparatum in statum felicitatis antiquæ ad devotionem Ecclesiæ plenè redierit, à qua visum fuerat persecutionis tempore recessisse, beneficium ei volumus gratæ visitationis impendere, ac in dilectione ipsius prædecessorum nostrorum vestigiis adhære. Cum autem ipsum inter universas orbis provincias tanquam Ecclesiæ patrimonium specialiter diligamus, volentes mentis affectum, quem circa ipsum gerimus, ostendere plenius in persona Legati, eum illuc de fratrum nostrorum consilio duximus destinandum quem inter ceteros fratres nostros speciali caritate diligimus, & benevolentia singulari ejus exigentibus meritis amplexamur. Sanè cum adhuc in regno ipso remanserint vestigia quædam dissensionis antiquæ, talem & tantam personam hujus legationis officio duximus deputandam, quæ auctoritate præmineat, polleat honestate, & in opere & sermone sit potens, & ex eo quod gratiam nostram plenius obtinet, & nostram novit meliùs voluntatem, eos qui pacem regni turbare forsitan moliuntur, liberiùs com-

primere possit, & universum regnum in carissimæ in Christo filiæ nostræ Constantiæ Imperatricis Reginæ ac filij ejus Friderici Siciliæ Regis illustris fidelitate pariter & obsequio stabilire, contumaciam deprimens superbiorum, & colla sublimium commissa sibi potestate conculcans. Venerabilem igitur fratrem nostrum Octavianum Hostien. Episcopum, apost. sedis Legatum, virum providum & honestum, qui ob gratiam familiaritatis & dilectionis antiquæ ac suæ dignitatis intuitu primum inter fratres nostros apud nos locum meruit obtinere, in regnum Siciliæ duximus destinandum: qui juxta verbum propheticum dissipet & evellat quæ noverit evellenda, & ædificet & plantet quæ cognoverit esse plantanda; vos etiam de benevolentia quam circa prædictam Reginam & filium ejus Regem illustrem gerimus, efficiat certiores. Ideoque universitati vestræ per apost. scripta mandamus & districtè præcipimus quatenus prædictum Legatum sicut personam nostram, immonos ipsos in eo recipientes humiliter & devotè, & sicut concedet vos & ipsum, honorificè pertractantes, quæ inter vos corrigenda duxerit, seu etiam statuenda, recipiendi humiliter, & inviolabiliter observetis: ita quod nos, qui honorem ejus proprium reputamus, vobis propter eum respondere gratiùs quasi ex debito teneamur. scituri quod sententiam quam in contumaces tulerit, ratam habebimus, & faciemus auctore Domino inviolabiliter observari.

In eundem modum Archiepiscopis, Episcopis, Abbatibus, Prioribus, & universis Ecclesiarum Prælatibus per regnum Siciliæ contra Farum constitutis: ita quod ubi ponitur in regnum Siciliæ duximus destinandum, ponatur Legatum in Siciliam & totum regnum duximus destinandum.

A. N. NEAPOLITANO Archiepiscopo.

Cum secundum doctrinam Apostoli non sit conveniens ut unus sit ebruius & alter debeat esurire, nec juxta instituta canonica uni personæ tantum debeat de redditibus ecclesiasticis assignari unde scrupuloso corde alij moveatur, qui ad dispositionem Pontificis sunt pro personarum meritis dividendi, non sufficimus admirari quod, sicut nostris

Epist. 414.
De pluralitate beneficiorum restringendi.
Cap. Cum locandam doctrinam. De Prebendis in Testa Collat.

auribus est relatum, in Ecclesie tibi commissa stipendiis obtinendis, quod iniquum est & absurdum, imperiti magistris, novi antiquis, rudes emeritis preferuntur. Vnde Iohannes filius quondam * Comitis Aliern. Ecclesie tue Clericus plus potentia patris sui quam prædecessoris tui spontanea voluntate ultra viginti Ecclesias in civitate Neapolitan. & in majori Ecclesia beneficium maximum proponitur obtinere. Cum ergo in nullius persona prætermittendum sit quod in statutis generalibus continetur, fraternitati tue auctoritate præsentium indulgemus ut non obstante appellationis diffugio superfuitatem ad moderamen reducās, non plus de redditibus ecclesiasticis Clerico præfato dimittens quam apud unum de plus habentibus noscitur residere; aliis omnibus beneficiis personis idoneis conferendis, quæ cum officiis divinis inserviant, nondum adeptæ sunt stipendia Clericorum. Nulli ergo &c. concessionis &c. Datum Laterani Idibus Novembris.

*AN. NEAPOLITANO
Archiepiscopo.*

AD nostram noveris audientiam pervenisse quod dudum à te quasi per extorsionem tale fuit præstitum juramentum, quod in omni causa deberes ordinem judicarium observare. Verum quoniam secundum traditiones canonicas manifesta accusatione non indigent, nec in eis est ordo judicarius observandus, qui debet in aliis observari, neque tu, quando sub præmissio tenore jurasti, habebas in mente ut propterea venires contra canonicas sanctiones; (alioquin non juramentum, sed perjurium potius exstitisset, nec aliqua ratione servandum) nos juramentum tuum benignius interpretari volentes, ita quod consonet canonicis institutis, fraternitati tue auctoritate præsentium intimamus quod in manifestis & notoriis ratione juramenti præmissi non credimus te teneri servare * subtilitatem ordinis judicarij, quam in his non servari per omnia ipsa quoque juris ratio postulat & requirit. Vnde videbitur, nec immeritò, subtiliter intuenti de ordine judiciorum procedere ut in præmissis non per omnia ordo judicarius observetur: quanquam & secundum approbatum intellectum scripturæ divinæ rectè

possit intelligi quod jurasti ut in omnibus causis ordinem judicarium observares, in illis videlicet in quibus est ordo judicarius observandus. Sic ergo faciens, & juramenti tenorem servabis, & instituta canonica non omittes. Datum Laterani XVIII. Kal. Decembris.

*ABBATIBVS, ABBATISSIS
& aliis Ecclesiarum Prælati Ecclesie
Neapolitanæ subjectis.*

CVM sacris canonibus caveatur ne Abbatibus, Presbyteris, aliisque ministris de rebus ecclesiasticis vel sacro ministerio deputatis absque permissione ac subscriptione sui Episcopi aliquid alienare liceat, vel etiam obligare, non possumus non mirari quod, sicut nostro est apostolatu referatum, possessiones Ecclesiarum donare, vendere præsumitis, & locare, venerabili fratre nostro A. Neapolitano Archiepiscopo nullatenus requisito. Cum itaque cautum sit jure canonico & humano ut quæ contra leges fiunt, habeantur pro inutilibus & infectis, universitati vestræ per apostolica scripta præcipiendo mandamus quatenus ab his quæ præmissimus desistentes, bona Ecclesiarum, quarum conditionem meliorem potestis facere, non pejorem, nisi necessitas vel utilitas exegerit manifesta, & sine licentia præfati Archiepiscopi, alienare in præjudicium Ecclesiarum vestrarum nullatenus attentetis. Alioquin eidem Archiepiscopo dedimus in mandatis ut si aliter à vobis temerè factum fuerit, auctoritate nostra & sua, prout jus expostulat, decernat irritum & inane. Datum Laterani XVII. Kalend. Decembris.

*AN. NEAPOLITANO
Archiepiscopo.*

Sicut nostris est auribus intimatum, Ecclesia Neapolitana tanto premittitur onere debitorum, quod aliter liberari non poterit, nisi de ipsius possessionibus distrahatur, quod tu occasione juramenti post consecrationem, sicut moris est, præstiti, quo inter alia vendi possessiones Ecclesie prohibentur, absque licentia nostra facere non attentas. Nos igitur attendentes quod hujusmodi sacramenta sint ob favorem Ecclesiarum introducta, nec in earum debeant retorqueri læsionem, plenam de tua discretionem fiduciam obtinentes, ut pro Eccle-

H h iij

* In Tertia Col-
le. Avernensis
Comitiæ

Epist. 415.
Quod juramē-
tum bonis mo-
ribus & juri re-
pugnans non sit
obligatorium.
Cap. Ad nostrā.
De jurjur.

* In Tertia Col-
le. solennita-
tem

Epist. 416.
Ne bona & res
Ecclesie alien-
entur.

Epist. 417.
Propter debita
Ecclesie aliqua
vendere licet.